



Récit véritable

de  
ce qui s'est passé à  
l'essai du Remède du  
Sieur Contugi dit  
l'Orviatan -


293.






293.









RECIT VERITABLE DE CE QVI S'EST PASSE' A L'ESSAY  
du remede du Sieur Contugi dit l'Oruiatan, avec le remede du  
Sieur Polloni Operateur dans la Maison de Ville de Tolose en presen-  
ce d'une illustre Compagnie.

**I**L m'est impossible de pouuoir plus faire par le sentiment de ma conscience; le tour de main & la fourberie qui a esté faite au sieur Contugi en ce rencontre, quoy que ie n'en sois pas fort surpris, persuadé que la Vertu comme les lumieres du Ciel brille de sa propre splendeur, & s'éclaire de ses propres lumieres, & que nous puissions dire à son avantage qu'elle doit estre aymée pour elle mesmes sans regarder les mains qui nous l'apportent, & de quelle part qu'elle vienne a nous par le trauail ou par le merite des hommes, *Veritas propter se ipsam diligenda est.* Neantmoins la Vertu à ses ennemis & l'Enuie l'attaque avec tant de fureur que nous aurions de la peine à nous persuader son artifice & sa malice, si nous n'estions instruits & plainement connoissans que l'Enuie est vn vice general, & que les autres ne choquent que la Vertu qui leur est contraire & laissent l'homme dans quelque sorte de repos, car l'auarice ne persecute que la liberalité, le mensonge ne combat que la Verité, & ainsi du reste, mais l'Enuie fait la guerre à toutes les Vertus, *Virtutis comes inuidia est*: Si bien que nous pouuons dire qu'elle est vn mal vniuersel, & ce qui est de plus considerable & qui nous doit rendre plus attentifs aux desordres de ce vice, c'est que bien qu'il soit animé contre toutes les Vertus il reserue pourtant ses plus grands efforts contre les plus nobles, comme la foudre qui choisit les plus grands arbres, & entreprend avec plus d'ardeur les Vertus qui paroissent avec plus d'éclat, veu qu'elle anime les Demons contre les hommes, & leur inspire les moyens de les perdre, comme dit fort bien le Prophete, *Peccator videbit & irascetur*: Et ce n'est pas de merueille si nous voyons aujourd'huy le merite du Sieur Contugi dit l'Oruiatan dans la persecution, mais il luy restera tousiours plus de vertu que ses ennemis n'auront de malice, son renom s'estant étendu par toute la France, le zele au bien public le porta en la Ville de Tolose, où ayant demeuré quelque temps, & fait cōnoître la valeur de son remede on luy permit l'établissement d'une boutique afin que chacun peut avec plus de facilité se seruir de sondit remede, mais elle donna telle enuie aux Bayles des Apoticairez qu'ils presentèrent requeste au Parlement pour la luy faire fermer, où n'ayant point trouué satisfaction ils songerent à la détruire par autres moyens, & se seruant de l'occasion, le Sr Polloni Operateur se trouuant dans la ville de Tolose le susciterent à demander l'épreuue de son remede contre l'Oruiatan, ce qui luy fut accordé, & ordonné qu'elle seroit faite sur des animaux en presence de Messieurs les Deputez de la Cour, à l'assistance des Bayles des Apoticairez, & ie veux vous rendre scauans avec fidelité de tout ce qui se passa dans cette occasion comme estant vn des témoins oculaires qui ne peut souffrir qu'un imposteur aye fourbé vne si grande Ville que Tolose, & pour commencer ie vous diray.



Premierement, Que les ennemis de la reputation de l'Oruiatan & de l'excel-  
lence de son remede s'avisèrent de calciner l'arsenic qui estoit destiné pour faire  
l'essay, & par cette voye luy osterent le moyen de faire du mal, & ceux qui le vi-  
rent mettre dans les écuelles reconnurent bien par la large extension qu'il faisoit  
sur l'eau qu'il estoit mixtionné, estant de sa nature extremement pelant, outre  
qu'il ne blanchit iamais l'eau quand il est naturel, & l'Apoticaire qui le pesa scait  
bien dans son ame que ie dis la verité, & ie m'étonne que les deux Medecins  
qui estoient presens ne le reconneussent, estant veritable que ledit Contugi ny étoit  
pas present lors que ledit arsenic calciné fut pelé en masse, mais quand il y eut  
esté il ne l'auroit non plus connu que quand il le vit en poudre.

En second lieu, il est à remarquer que lors que ledit Operateur Polloni se fit  
donner les écuelles par l'Apoticaire il y mit la main dextre dessus, & laissa choir  
dedans vne pilule de sublimé qu'il tenoit entre ses doigts, l'ayant prise de sa po-  
che vn peu auparauant, & pour faire croire qu'il auoit pris l'écuelle à vn autre  
dessein il feignit prendre la matiere qui estoit dedans, & ne la voulut iamais las-  
cher à l'Oruiatan qui li luy vouloit oster, sans pourtant s'imaginer le tour de  
main que l'on luy iouit, consentit que l'Apoticaire qui estoit le confident du  
Sieur Polloni Operateur le prit, & avec vne adresse qui ne pouuoit estre conceüe  
que par celuy qui la deuoerte, battoit ladite matiere avec vne Spatule double  
laquelle estoit pleine de sublimé, & il estoit bien difficile que dans l'action per-  
sonne y prit garde, mais Dieu qui ne veut pas que l'innocence soit tousiours dans  
la persecution a permis que tout se soit decouvert afin qu'il soit connu à tout le  
monde que ledit Cortugi s'est laissé surprendre dans cette occasion tandis  
qu'il s'amusoit à regarder la Compagnie au lieu de songer à son affaire, car lors  
que le sieur Polloni demanda des écuelles, & qu'il ne voulut pas des verres, Cō-  
tugi deuoit s'y opposer, & par cette voye il auroit empesché que le Sieur Polloni  
n'auroit pas peu mettre sa pillule de sublimé dedans veu qu'on l'auroit peu voir  
à trauers ledit verre; outre, & qui est le plus considerable l'Apoticaire n'auroit  
peu battre ladite matiere avec son Spatule artificielle, & pour iustifier que Pol-  
loni auoit ajusté tout son dessein avec esprit il auoit fait faire vn entonnoir avec  
son cōduit de la largeur d'vne piece de trente sols pour que les pilules de sublimé  
passassent plus facilement dans la gorge des pourceaux lequel il couuroit de sa main  
droite, & faisant semblant de le remüer il y faisoit choir lesdites Pillules de  
sublimé, & afin que l'Oruiatan ne soupçonnât pas de le voir d'vne façon toute  
particuliere ledit Polloni luy auoit demandé de la monnoye pour l'enuoyer que-  
rir par vn Sergent del'Hostel de Ville qui estoit vn de ses confidens lequel fut  
bien tost de retour, & il y en eut beaucoup dans l'Assemblée qui demanderent  
pourquoy il estoit fait de cette façon, & ledit Oruiatan ny prit par garde ayant  
toute sa confiance en la vertu de son remede, & ne conceut pas que l'enuie  
a tousiours de nouveaux artifices contre celuy quelle veut destruire, car si le-  
dit Entonnoir eut esté de la façon des autres, n'agardé que les pilules du sublimé  
qu'il y mettoit dedans avec vne adresse merueilleuse fussent passées par le con-  
duit, & hors de l'auoir veu comme moy il est inconceuable.

En troisiéme lieu, il est à remarquer que Polloni scauoit bien que tous les pour-  
ceaux sur lesquels on faisoit l'essay auoient pris d'arsenic calciné, mais qu'il y en  
auoit vn qui n'auoit pas auallé de pilules de sublimé duquel il se faisoit pour luy

bailler son remede, & quelle instance que Contugi fit de tirer au fort, le Medecin nommé Perpan se leua de son siege en colere, & dit en abordant ledit Contugi que s'il ne vouloit pas que Polloni prit le pourceau qu'il auoit choisi il feroit l'experience tout seul, d'où il faut iuger de la protectiō qu'il dōnoit audit Polloni.

En quatrième lieu, il faut sçauoir que de trois pourceaux qu'il y auoit pour faire l'essay il y en auoit vn qui n'auoit mangé que de l'arsenic calciné, & les autres deux auoit receu non seulement ledit arsenic calciné mais encore les Pilules de sublimé par la subtilité inconceuable dudit Polloni, & l'Assemblée vit en vn instant vn vomissement extreme tant au pourceau que l'Oruiatan fit prendre de son remede, qu'à celuy qui n'en auoit pas pris, & celuy de Polloni ne rendit pas gorge parce qu'il n'auoit pas pris de si bons morceaux, ce qui fait voir visiblement qu'il y auoit de la fourberie, & en effet au chien auquel on bailla du sublimé à la premiere Assemblée il vomit tout incontinent, veu qu'il ny a que le sublimé qui fait vn si prompt effet à cause du vitriol, & de sa qualité bruslante & caustique; car si par malheur vn homme auoit pris du sublimé il faudroit avec grand promptitude pour luy bailler quantité d'huile avec de l'Oruiatan, & aussitost vomir luy en donner d'autre cōtinüant incessamment à luy en faire prendre iusques à parfaite guerison attendu que le secret de l'Oruiatan defaut de la qualité venimeuse si tant est qu'il y en aye, ce qui ne demeure pas accordé, & non pas de la caustique & bruslante, & c'est pour cette raison qu'il y faut d'huile, & autres choses grasses pour empêcher qu'il ne s'attache aux parties nobles, & s'il arriue que vous voyés sur le Theatre de charlatans qui prennent du sublimé, ce sont des imposteurs attendu qu'il est du dulcifié, comme vouloit faire Polloni à la premiere Assemblée de donner du dulcifié au chien, si l'autre qui auoit pris le véritable n'eut vomir si tost, les Apoticares leur ayant baillé vn paquet de soixante grains au prejudice de la beste pour l'inciter plutôt au vomissement, & par ce moyen empêcher l'experience à cause que ledit Oruiatan ne voulut pas choisir vn chien que plutost ils n'eussent tous pris de poison pour tirer après à la courtepaille, & par là couper le tour du paquet du sublimé dulcifié, car à ladite premiere Assemblée que les Apoticares piloient le poison avec le marteau, on voyoit bien par la multitude de tant de paquets semblables que c'estoit pour ioüer le tour de main. De plus il estoit bien visible de cōnoistre ce dernier mystere qu'on fit trouuer à point nommé deux paysans avec de batons pour ouuir la bouche aux pourceaux sans que ledit Oruiatan les eut appellés, & plusieurs de la compagnie virent bien qu'ouurât la bouche au pourceau de l'Oruiatan pour lui bailler de son remede ils luy mirent tous deux les genoux sur les costes, & j'entendis que l'Oruiatan cria à ces paysans qu'on le pressoit trop, & en effet quand ils le quitterent il demeura étendu à terre sans se leuer, & ledit Oruiatan fut contraint de luy donner vn coup de pied pour le faire leuer, ce qu'il ne fit qu'avec grand peine, d'où ie conclus, Messieurs, que personne n'ayme la condition d'vn Forçat parce que sa vie est plaine de souffrance, mais que l'enuie pousse l'homme lors qu'il est arriué au point de la gloire comme le sieur Contugi dit l'Oruiatan, lequel il faut auoüer avec verité qu'il a sujet d'estre le plus glorieux du siecle, puis que nous ne voyons point d'homme sur le Theatre avec l'éclat qu'il y paroît, & que les effets de son remede sont cōnus par tout le mode & l'experience qui s'en fait tous les iours nous fait allés cōnoistre qu'il n'est pas charlatan, & que l'enuie ne détruira iamais son merite.



